



4. juni 2010

Inatsisartut suleriaasiat § 36 immikkoortoq 1 naapertorlugu Naalakkersuisunut imaattumik apeqquteqarniarpunga.

Naalakkersuisunut Apeqqut:

- Oqaatsinut politikki pillugu Inatsisartut Inatsisaannut tunngatillugu Naalakkersuisunut apeqqutigerusuppara § 4, imm. 1 aamma 3-mik ”unioqqutitsisut” qanoq isillutik unioqqutitsisutut inissisimalersinnaanersut?
- Aamma Kapitali 2, § 4, imm. 3-mut tunngatillugu apeqqutigerusuppara suliffeqarfiit pikkorissartitsissappata pikkorissarnerat kiap akilissaneraa?

(Inatsisartuni ilaasortaq Malik Berthelsen, Siumut)

Tunngavilersuut:

Siullertut:

Oqaatsinut politikki pillugu Inatsisartut Inatsisaat maj-ip 18-ni Inatsisartut amerlanerussteqartunit akuerneqartumut tunngatillugu marlussunnik apeqquteqarpunga.

Suliffeqarfiit oqaatsinut politikkiornissaminni politikkip qanoq imaqarnissaa suliffeqarfiit namminneerlutik aalingertussaavaat. Taamaakkaluortoq politikkip imarisinnaasaanut Naalakkersuisut Kapitali 2-mi § 4. Imm. 2-mi Naalakkersuisut suliffeqarfinnut imatut kajumissaaruteqarput, ”Oqaatsinut politikkiimi ataani qulequttat assigiinngitsut 5-it imaritinneqarsinnaapput”.

Oqaaseq ”imaritinneqarsinnaapput” siunnersuutaannaavoq naalakkiutanani. Taamaattumik Kapitali 4, § 7 imatut allassimavoq, ” § 4, imm.1-mik aamma 3-mik unioqqutitsineq akiliisitaassutigineqarsinnaavoq”.

Taamaattumik Naalakkersuisunut apeqqutigerusuppara § 4, imm. 1 aamma 3-mik ”unioqqutitsisut” qanoq isillutik unioqqutitsisutut inissisimalersinnaanersut?

Tassami oqaaseq § 4-mi imm. 2-mi atorneqartoq ”imaritinneqarsinnaapput” naalakkiissutaanngimmat, naalakkiissutaanngitsorlu unioqqutinneqarsinnaanngilaq, naalakkiutaanani taamaaliortoqarsinnaanera pillugu periarfissiisutaannaammat.

Aappaattut:

Aamma Kapitali 2, § 4, imm. 3-mut tunngatillugu apeqqutigerusuppara suliffeqarfiit pikkorissartitsissappata pikkorissarnerat kiap akilissaneraa?

Naalakkersuisummi paasissutissiinera malillugu aningaasaliissutiginiarneqartut 2,2 mio. kr. annerusumik tasaanerarpai UPA pkt.153-mut ilinniusionermut aamma tuluttut pikkorissarnermut atugassat.

Taamaattumik paaserusuppara sulisut ilinniartitsisulerlutik pikkorissarniarpata akiliunneqarnissaminnut sutigut periarfissaqarpat? Suliffeqarfiimmi namminneerlutik oqariartuutigisareerpaat aningaasanik malitsitsisoqanngippat inatsisissaq naammassineqarsinnaanngitsoq.